

## HEADLINES

1. Larsap Gen (Retd) VK.Singh chuan vawiin khan Lunglei a tlawh .
2. Education Minister Dr Vanlalhlana chuan Central Service-a Mizo te tling thei turin MBSE hnuaiah UPSC Grooming kalpui a ni dawn a ti.
3. Chakma Autonomous District Council a Kamalanagar West bial a By electionah ZPM Candidate Dinesh Moy Chakma thlantlin a ni.
4. Union Minister for Chemicals and Fertilizers J P Nadda chuan dan kalha leitha tawlhruk leh chheprelh titawp turin sawrkarin nasa takin hma a la a ti.

<><><>

## GOVERNOR

Larsap Gen (Retd) VK.Singh chuan vawiin khan Lunglei a tlawh a, Larsap hian Department Head te a kawm hnuaah 20 Assam Rifle camp a tlawh a, War Memorial-ah sipai martarte zahna lantir nan pangpar a dah bawk.

Lunglei DC Conference Hall-a Sawrkar Department hotute a kawmnaah Larsap chuan DC office pan harsatte tan remchang siam saka an harsatnate chinfel sak zel tum turin a chah a. Sawrkar laipuiin zirna tihhmasawn nan sum leh pai tam tak a sen thu leh Mizoramah ngei pawh school tha tak tak, Eklavya Model Residencial School, Kendriya Vidyalaya leh Jawahar Navodaya Vidyalaya-te mitin banphaka a chhawp chhuah thu sawiin, hengte hi Central Service-a inziahlulh nana chhawr tangkai tum turin mipuite a chah a ni.

Larsap chuan hmeichhia, naupang, thalai, loneitute leh miretheite tan Sawrkar laipuiin scheme tha tak tak a siam thu sawiin, hengte hian hamthatna dawng tur dik takte a thlen theih nana theihtawp chhuah tur leh a tulna apianga kaihkawpa thawhhona tha nei turin department hotute a chah a. Dan leh thupek kenkawh leh ruihhlo do kawngah khawtlang huapa tanrual a tul thu sawiin, thenawm ram leh kan chhehvela thil thlengte ngaihvena beng chhit tlan reng a tul a ti a, dan leh thupek kenkawh leh ram venhim kawngah mipuite chu thuneitue tha taka tawiawm tlat thin turin a chah a ni. Kan corr report lo ngaithla ang.

*Larsap Gen (Retd) VK.Singh a hian Circuit House ah Kohhran hruaitu, YMA,MSU,MZP leh MHIP te a kawm a, Lunglei YMA Sub.Hqtrs hruaitu te hian Lunglei Civil Hospital a MRI dah anih theih nan hmalak sak turin an ngen a, Governor hian lo bawhzui a tum tih a sawi . MSU leh MZP hian Mizoram Polytechnic Lunglei in harsatna a tawh mek chungchang chinfenl pui turin ngenna an thlen a, heibakah hian ATL Road siam that dan tur chungchanga harsatna awm chingfel turin an ngen bawk. Ex-Servicemen te pawhin hmuin an harsatna hrang hrang te an thlen. BCM Gen.Secy leh Divisional Commander,The salvation Army te pawhin sawm an nih angin an hmu a, Kohhran hruaitu te hian India ramah Christian te chu Minority an nih dan te sawiin harsatna awm thei lakah beng lo chhitpui turin an sawm a ni.*

<><><>

## HAR GHAR TIRANGA

Har Ghar Tiranga Campaign hnuaiah Khawzawl Deputy Commissioner huaihawtin Khawzawl khaw chhunga School hrang hrang pali ah vawiin khan exhibition buatsaih a ni. Kan corr report lo ngaithla ang.

*Har Ghar Tiranga pual Exhibition hi PES Vengthar Pastorate, Govt. Little Flower School, Govt. Model High School leh Govt. Khawzawl Higher Secondary School-ah te neih a ni a. Har Ghar Tiranga kaihnawih banner leh poster te phochhuahna hun hman a ni a, School hrang hrang te'n Classroom bangah te leh hmun rem laiah te lemziak leh banner te tarin India ram Independence kan lo neih chhoh dan te leh zalenna sualtute chanchin a lem nena phochhuah a ni.*

*He campaign hi Phase thuma then a ni a, vawiina exhibition buatsaih hi Phase 1 kharna hun niin Phase 2 leh 3 te hi August ni 15 thlenga neih leh tura ruahman a ni.*

*He hunah hian DC Office bakah Khawzawl District chhunga department hrang hrang atang tein official te an tel a ni.*

<><><>

**EDUCATION MINISTER**

Education Minister Dr Vanlalhlana chuan Central Service-a Mizo te tling thei turin MBSE hnuaiah UPSC Grooming kalpui a ni dawn a ti.

Tun hnaia Indian Information Service Greoup B Sr Grade a tling thar Andrew Lalchhandama -a lawmpuina-ah he thu hi sawiin Minister chuan Mizo zirlaite chu heti lama hlawhtlinna an hmuh tam theih nan theihtawp chhuah a ngaih thu a sawi a, Mizo zingah kum 2013 hnu lamah Central Service-a tling thei an awm ta lo chu zirchian a ngai hle a ti a, eng ang zirna nge an dawn bik a, tuna zirna kal dan hi a dik tawh lo nge tih uluk taka enchian a syllabus te pawh ennawn a ngaih thu a sawi.

Hemi kawngah hian systematic taka kalpui a hmalak tum a ni tih Dr Vanlalhlana chuan a sawi a, competition a san tawh avangin Pawl 10 pass te atangin he UPSC grooming hi kalpui a ni ang a ti a, kil tin atanga theih tawp chhuah a ngaih avangin tu te pawhin mi tum ruh leh hlawhtling te chu lawmpui thiam a an hlutna hriatthiam pui a ngaih thu a sawi bawh a ni.

<><><>

**NATIONAL HANDLOOM DAY**

Mizorama National Handloom Day vawi 11-na lawmna kal mekah vawiin khan Aizawla Millenium Centre Rooftop-ah Mizo puantah hrang hrangte lei theih tura phochhuah a ni. Kan corr report lo ngaihla ang.

*National Handloom Day hi kum tin August ni 4-ah rampumah, mahni ram dehchhuah hman uar inzirtirna Swadeshi Movement hriatreng nan, puantahtute ni atan hman thin a ni a, ram mipuite chu tualchher thil leh puante hmang uar tura inzirtirna atana hman a ni. National Handloom Day puala Millenium Centre chungzawla puan chi hrang hrang zawrhna hmun siam pawh hi mipuiin an hlut hle a, puantah-a eizawngtute pawhin Commerce and Industries kaltlanga inphochhuahna hun an buatsaih sak thin chu lawmawm an tih thu an sawi a, Mizo culture chawikanna anih bak ah zin mi te rawn hmuh atan pawh chhuanawm an tih thu an sawi a ni.*

<><><>

**AIR NEWS**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve ah Chanchinthar puan leh a ni ang.

<><><>

**KAMALANAGAR W BY- ELECTION**

Chakma Autonomous District Council a Kamalanagar West bial a By electionah ZPM Candidate Dinesh Moy Chakma thlantlin a ni. Kamalanagar West bialtu MDC, Sanjeev Chakma thihsan tak bial hnawhkhat tur hian State Election Commission ruahmannain by election neih a ni a, August 6 tunkar Nilaini khan vote thlak a ni a, inthlannaa vote tlate hi vawiin khan DC Office Lawngtlai a Counting Hall ah chahwma dar 10 atang khan chhiar niin, ZPM Candidate Dinesh Moy Chakma chu Vote 724 hmuin thlantlin a ni. Kan corr report lo ngaihla ang.

*Kamalanagar West biala thlan tlin ZPM Candidate Dinesh Moy Chakma hnaih ber tur BJP Candidate Joydeep Chakma chuan Vote 715 hmuin ZPM Candidate nen Vote 9 in an inthlau a, MNF Candidate Rupayan Chakma chuan Vote 74 hmuin, Indian National Congress Candidate Pi Kalpana Chakma chuan Vote 21 a hmu a, NOTA ah vote tla 3 awmin, Kamalanagar West By election ah hian Vote 1537 a tla.*

*Chakma Autonomous District Council hi Governor thuneihna hnuaiah Lawngtlai DC enkawlna hnuaia awmlai a ni.*

<><><>

**MPCC**

Mizoram Pradesh Congress Committee chuan enchhin sawrkar ZPM in BJP a zawm tan niin a lang a ti.

Vawiina Congress Bhavan-a MPCC Political session ah MPCC President Pu Lal Thanzara chuan thusawiin August ni 7 khan NDA, BJP leh a thawhpuite chuan meeting an nei a, hemi tum hian Lok Sabha MP Richard Lalhmangaiha chu a tel ve a, ZPM hian kum 2023 Assembly inthlanah BJP sum an hmang nasa nia sawi a awm a, Lok Sabha Speaker thlanah pawh BJP an lo vote tawh bawk a, enchhin sawrkar hian BJP a zawm tan niin a lang a ti .

MPCC President chuan ZPM sawrkar chu ICU ah Ventilator hmangin a nung che che a, hemi chhanchhuak tur hian mipui ten MNF party an beisei lo a, Congress party an beisei mek a, a chhan chu an hruatuiten an thutiam an hlen thin vang a ni, a ti.

ZPM sawrkar chuNatna khirh tak pathum an vei mek ah puhin, Sum puk natna te, Kawng chhia natna te, Sum lengvak tlem leh ruihhlo a hluar a, khawtlang nun tlahniam nasa lutuk te a ni a. ZPM vote tu tamtak te hi an beidawng tawh em em a ni, a ti.

<><><>

**JP NADDDA**

Union Minister fo Chemicals and Fertilizers J P Nadda chuan dan kalha leitha tawlhruk leh chheprelh titawp turin sawrkarin nasa takin hma a la a ti. Vawiina Lok Sabha inkhawma zawhbelhna chhangin Pu Nadda chuan fertilizer chu mipui nitin mamawh essential commodity ah puan a ni tawh tih sawiin Fertilizer Control Order, FCO 1985 leh Fertilizer (Movement Control) Order,1973 hmangin thunun anih thu a sawi a. Nepal, Bangaldesh leh Myanmar ramri depa awm state te chu India atanga ramdanga fertilizer tawlhruk uluk taka lo vil turin a duh thu a sawi bawk a ni.

<><><>